

## Tchaintans ensoéne.

Sur l'air de « La Rauracienne »

1.) Dâs Beuv'néjin - â long de lai frontiere,  
E Sain'leudgie - â paiys dés Loitchous,  
Dâs Montfâcon - è doux pas dés Roudg's-Tieres,  
E Rôss'mâjon - tot prés de cés Trissous,  
Nôs véyes dgens - tiaind qu'êls étint ensoéne,  
C'ât en patois - qu'ès s'botint è tchaintaie.

### REDYÏNDIAT

**Tchaintans c'ment yos,  
Aimis de ci coénat  
Et baiyans-nos lai main (bis).**

} 2 x

2.) Els aint tchaintè - lai fanne èt lai botoiye,  
Carimantran - lai lôvrèe lés aimis,  
Et taint breûyie - qu'an s'boûetchaît lés arayes,  
D'vaint que d'paitchi - po ci bé pairaidis,  
Els aint tchaintè - lai s'nainne èt lo dûemoinne,  
Ctu que se coidg' - peut les r'öyi tchaintaie.

3.) Dains yôs tchainsons - ès djâsant de lai dyierre,  
De cés nitious - que pûerant dains lai neût,  
Et di Bon Dûe - â fond de yôs prayieres,  
Es v'lant qu'E b'nâch - yôs afaints que sont feûs,  
Cés redyïndiats - que dremant dains lés tiûres,  
Reprentes-les - po ne pus les rébiaie.